

Q. F. F. F. Q. S.
QUÆSTIONES MEDICÆ
SEX,

AB

ILLUSTRISSIMIS VIRIS
RR. DD. ANTONIO MAGNOL, Decano Venerando,
HENRICO HAGUENOT, JACOBO LAZERME,
FRANCISCO DE SAUVAGES, CAROLO
SERANE, FRANCISCO DE LAMURE,
FRANCISCO IMBERT, R. D. MAGNOL, Coad-
jutore, Regis Consiliariis, Medicis & Professoribus
meritissimis.

PROPOSITÆ

IN AULA EPISCOPALI MONSPELIENSI
coram Illustrissimo ac Venerabili D. D. FRANCISCO
GABRIELE DE POMIÉS DE ST. BONNET, Doctore
Sorbonico, Abbate Sancti Policarpi, & Vicario Generali.

*Pro Regiis Cathedris Botanices & Chimie in unam conjunctis ex
Decreto Sanctioris Consilii, vacantibus in Universitate Aquisextanâ.*

Per obitum RR. DD. STEPHANI BERTIER & JOSEPHI BEGUE,
Regis Consiliariorum & Professorum meritissimorum.

*Quas Deo favente, & auspice Deiparâ, propugnabit in Augustissi-
mo Monspelienſis Apollinis Fano, triduo integro manè & sero;
diebus 2, 3 & 4 mensis Augusti anni 1753.*

ANDRÆAS-GEORGIUS-JOSEPHUS PELICOT,
Aquisextanus, D. M. M.



MONSPELII,

Apud JOANNEM MARTEL, Regis, Occitaniæ Comitiorum,
& Universitatis Typographum. 1753.

**DEO
UNI ET TRINO;
VIRGINIQUE**

DEI-PARÆ;

D. D. D. C.

ANDRÆAS-GEORGIUS-JOSEPHUS PELICOT.



QUÆSTIO PRIMA.

AN VEGETABILE REGNUM REMEDIA SUPPEDITET

curando Colico dolori nephritico?



A est hominis conditio ut plurimis obnoxius vivat morbis, è quibus multi, ad quos ineluctabili necessitate trahitur, multi quos sapientiam illius ^{renes} esset præcavere: porro inter morbos qui indolis pessimæ haberi solent, ille meritò recenseri potest, qui renes, iisque continuos obsidet ureteres. Talis est dolor nephriticus, qui nihil aliud sonat apud Medicos, quàm molesta sensatio, modò major, modò minor, ad lumborum regionem internè referenda, quam semper excipit, aut urinæ secretionis imminutio, aut ejus omnimoda suppressio. Dolor ergò simplex esse debet, ut hunc merè nephriticum denominari liceat; sin autem huic comes adjungatur inflammatio, & inflammationem subsequencia phænomena, hunc nephritidis nomine insigniri convenit cum recentioribus Medicis, licet antiquorum diversa fuerit denominatio (a).

Doloris itaque nephritici in ipsis renibus, aut in eorum ureteribus sedes est; in iis ergò partibus causa morbi proxima hærebit; nec aliundè repetenda, quam ab eâ fibrillarum nervearum in iisdem partibus distensione quæ earum rupturam minitatur: hinc sequitur tantum fore dolorem quanta erit ipsa nervorum distentio, nullum, (saltem in ipsissimâ

(a) Gorræi, def. med.

parte ruptâ) si fiat disruptio , aut in statu naturali remaneat. (*a*)

Cùm igitur ex diverso fibræ nervosæ tensionis gradu diversa pendeat doloris idea ; meritò accusanda erunt tanquàm causæ doloris nephritici remotæ , quæcumque renum , aut ureterum nervosas poterunt distendere fibras , humorum liberum & expeditum per ipsos effluxum , transfluxum impedire aut pertubare. Huc spectant , 1°. Materies viscidæ , quæ glutinis instar , tubulos renales urinæ secretorios obturant, vel vasorum parietibus ità adhærent, ut imminutâ ipsorum diametro , difficilius permeent , & suos quique circuitus obeant humores. 2°. Ipsamet contractio spasmodica in renibus inducta , vel propter frigus susceptum , vel quâcumque aliâ de causâ. 3°. Ipsi sanguinis spissitudo , cujus moleculas , non nisi difficulter excipiunt vasa renalia , ad venulas haud transmittere possunt , quin alicubi hæreant , aut eas ad punctum secretionis urinariæ perducere , quin similis exindè oriatur obex. Hæc si contingant nullo negotio eruas quò pacto dolor nephriticus excitetur , urina parcè secernatur , & excernatur , tandem si causa intendatur , eò usquè omnia deveniant , ut renes inflammentur , acutissima febris accendatur , iisque cætera pessimi ominis accrescant , quæ innephritide observari solent. 4°. Vermes in renibus stabulantes dolorem accersent nephriticum (*b*) (*c*). Utî docuere sectiones cadaverum quorundam qui hoc morbo perierant. 5°. Calculi quorum præsentia , frequentissima morbi hujus causa deprehenditur (*d*). Omnium pessima & pertinacissima , ut potè , qui præ suâ duritie , nullo nobis cognito lythontryptico remedio dissolvi queant , quique variis sæpissimè adeò hirsuti apicibus , vel tantæ magnitudinis sunt ut hos eliminari nullâ arte finatur : ex ipsis tamen renibus foràs aman-

(*a*) Boerh. aph. 229.

(*b*) Holler. comment. ad aph. sect. 6.

(*c*) Bonet sepulch. anat. tom. ii. p. 579.

(*d*) Riverius , pag. 345.

dari contingit eos, quorum superficies sat levigata, moles exigua satis, ut tubulos urinarios renum, ipsosque ureteres permeare possint, sive arte paretur via, sive solis naturæ viribus expellantur.

Haftenus enarratæ causæ symptomata inducunt sæpè teterima; præter enim dolorem memoratum, urinæque suppressionem aut imminutionem, dantur quandòque cardialgiæ, nausea, vomitus, stupor cruris è directo renis laborantis, imò & ejus paralyxis; testiculi retrahuntur: quæ tamen omnia non jugiter observari solent, nec nisi dolorem summoperè acutum subsequuntur; acutior autem cùm calculus hæret in uretere quam cum in rene. Hæc si diù durent, supervenit epilepsia ob continuos spasmos, in gravidis abortus. (a)

Tristissima igitur iis portenduntur qui diro illo morbo affligantur, si causa (calculus finge) ita in renibus aut ureteribus delitescat ut hunc auferre non detur arti. Nequè à novo futuro dolore immunis censendus erit æger, etiamsi calculos aliquot rejecerit, & dolor inducias fecerit: metuumdum erit interea nè mox alii generentur, aut geniti dolorem exsuscitent. Ast si non à calculis pendeat dolor nephriticus debellari poterit facili negotio; nisi fortè à vermibus intrà renum substantiam foveatur morbus, quo in casu rarissimo equidem, an mors potiùs immineat, quam spes salutis affulgeat, non nostrum est determinare, cùm eâ de re, nec signum pathognomonicum, tradiderint Autores, nec therapëiam commonuerint.

Antequàm Medicus se doloris nephritici curationi accingat, de indole morbi, ejusque causâ singulari foveat certus sit: non fortè hunc indubitanter edoceret ipse dolor, sedem esse in renibus, vel ureteribus, nisi ad doloris gradum, indolem & quantitatem excretorum per urinæ vias attenderet, & ad omnia simul quæ apparent symptomata. Non de causâ singulari certò pronuntiaret; nisi sedula de antecedentibus

(a) Ettmuler, tom. I. pag. 617.

fieret inquisitio. Ergò ex omnibus simul sumptis haurienda est diagnosi integra; nè seorsim sumpto cuidam credens symptomati, in errorem inducatur.

Sicut pleraque ex symptomatibus quæ quandòque dolorem nephriticum concomitantur, ab ipsiusmet doloris intensitate desumenda sunt; ità plerisque succurras, si dolorem compescere possis. Summâ igitur ope nitendum est primò, ut tensis fibris nervosis procuretur laxitas: Ad id operis conducent venæ sectiones, quæ etiàm inflammationis metum amovebunt; conducent & narcotica, balnea aquæ tepidæ, fots & enemata cum decocto plantarum emollientium, inprimis parietariæ, quàm in tali casu mira præstitisse, fidelis & iterata docuit observatio, præsertim cùm hujus decoctum pro potu usurpatur. Egregii insuper auxilii sunt, ptisanæ cum diureticis frigidis, virtute emollienti præditis, & è regno vegetabili desumptis, v. g. cum radicibus althææ, nymphææ, floribus malvæ & nymphææ. Iis omnibus adjungi possunt emulsiones cum seminibus frigidis paratæ. Ast si calculum constet hære intra cavum ureterum, nihil illius magis favebit exitui, quàm oleum amigdalaram dulcium, cujus ope laxantur ureteres, eorum lubricantur parietes, ipsaque calculi superficies: hinc non solum facilior versùs vesicam reddetur descensus; sed & hebescet aliquatenus stimulus calculi, imminuetur dolor, cæteraque symptomata mitiora fient. Hæc intra paroxysmi tempus: extra verò paroxysmum ad id collimet Medicus, ut calculos, & arenulas, si quæ sint, foràs eliminet: ea igitur adhibeat quæ quâdam virtute lythontrypticâ gaudere existimant, quæ cùm uberiores urinæ secretionem promoveant, arenulas abripere possunt, & fortè calculos attenuare, & imminuere. Hujus generis, ejusque virtutis censentur remedium D. de Basville, (a) dominæ Stephen; calcitrapa, coronopus hortensis, cicer, saxifraga, &c. Si autem non calculo sed cui-

(a) Formulæ Carol. Barbeirac, pag. 161.

Histoire des Plantes des environs de Paris, herborisation première, Tournefort, pag. 13.

cumque alteri causæ prægressus paroxismus ortum debuit; ea seligat & adhibeat, quæ & causæ debellandæ, & præcavendæ in posterum idonea judicabit; v. g. cum accusanda est sanguinis spissitudo, diluentia, & leviter aperientia in usum esse debent, &c... Nulla autem est doloris nephritici species, nec causa singularis cognita, cui accommodari non possit aliquod remedium è regno vegetabili desumptum.

Ergò vegetabile regnum remedia suppeditat curando colico dolori nephritico accommodata.



QUÆSTIO SECUNDA.

An Caro Kermes mineralis?

QUAM facile perverti possit usus insignis cerebri, quot, quantaque exindè toti machinæ subsequantur mala, nemini ignotum est, qui teneram nobilissimi illius visceris fabricam perspectam habet. Inter recensendos morbos capitis de Caro rectè ab Autoribus fit mentio, quique adesse dicitur quoties æger sopore, profundi somni imaginem referente detinetur, eique ità indulget invitùs, ut si vociferatione summa, concussione validâ, punctione, aut vellicatione acri excutiat, oculos equidè aperiat, membra stimulatâ retrahat, sed mox nullo dato interrogantibus responso, in pristinum statum relabatur: intereà respiratio libera nullo stertore stipata deprehenditur. Adest ergò in hoc morbo perceptio aliqua, sed momentanea, aliquis sensus, sed parvus (a); adeoque

(a) Boerh. aph. 1045.

apoplexia levis haberi, & nuncupari potest. Gravior tamen est comate vigili, comate somnolento & lethargo; qui morbi videntur tantum esse species Cari, sed leviores. (a)

Cùm igitur gradûs diversitas totum discrimen ponat apoplexiam inter & Carum, causas quamplurimas communes habebunt, sed in diverso tantum gradu: verùm cum omnibus ferè inconfesso sit, actionis cujuscumque exercitium motui fluidi nervei tribuendum esse, haud à vero discedere videbimur, morbi hujus reponendo causam proximam in effluxu liquidi cerebrosi in organa sensuum, motuumque voluntariorum, & vicissim hujus refluxu ab iisdem organis ad nervorum originem, sive ad sensorium commune, multò difficiliore quàm in statu naturali paulò faciliore quàm in apoplexiâ, superstitè interim, imò quandòque adaucto effluxu quodam liquidi cerebellosi in cor, & naturalia respirationis organa, qui ad has functiones sustinendas, & sæpè adaugendas sufficiat. (b).

Quæcumque igitur impediunt quominus liber sit effluxus fluidi nervei in partes memoratas, hujusque ab illis refluxus, numero causarum remotarum adscribentur meritò. Id efficient apprimè omnia quæ nervos prædictos in eorum comprimunt origine; quò spectant tumores varii in ipso cerebro vel partibus continentibus enati, humores quicumque extravasati, impacti, vel lentius quàm par est provoluti, sive id fiat defectu virium impellentium, sive præ ipsorum spissitudine, vel rarefcentiâ; nimia velocitas cruoris, versùs caput determinata; omnia pariter quæ libero sanguinis reditui à cerebro ad cor obstare valent, ut venarum jugularium compressio. His adde quæ intùs sumpta, aut exterius applicata, jam recensitis ansam præbere possunt; uti videlicet, ingesta acida coagulantia, inspiratus carbonum fumus, mineralium halitus, vulnera, contusiones capitis. Favent & ipsa animi pathemata quæ mirum in modum totius machinæ humanæ in-

(a) Boerh. aph, 1084.

(b) Herm. Boerh. inst. parag. 403. 404. 409. 601.

tegritatem perturbant (a) & plura hujusmodi quorum enumeratio longior foret.

Ex traditâ definitione pateſcunt Cari ſymptomata : cujuſcumque autem ſymptomatis explicatio ex morbi aſſignatâ cauſâ proximâ ſpontè fluit : requiritur enim nervorum integritas , totiusque illorum tractûs libertas , ut ſuo fungantur munere. Compreſſis itaque in origine ſuâ nervis , qui motibus voluntariis ſenſibusque externis proſpiciunt ; imminuitur , aut omnimodè ſiſtitur , pro comprimentis cauſæ validitate , influxus fluidi nervei , in partes motibus voluntariis ſubditas , imminuetur ergò aut penitùs tolletur functio partis. At verò cùm cauſa comprimens , non adeò validè agat in Caro , ac in apoplexiâ ; nil mirum ſi carotici impreſſiones validas obſectorum exterius agentium paululùm perſentiant ; unde acriter vellicati , aut puncti , membra retrahent , oculos aperient , in eundem mox relapſuri ſoporem , cùm minor ſpirituum animalium quantitas , partibus illis amandetur , & à partibus ad ſenſorium commune referatur , quàm ut motus ſenſusque liberè & conſtanter perfici poſſint.

Quæ hætenùs de Caro dicta ſunt genuinam illius à cæteris morbis ſoporofis diſtinctionem exhibent ; differt enim ab apoplexiâ propriè dictâ , ex eò quòd carotici expergefacti , oculos aperiant , membra acriter vellicata , punctave retrahant , ſomnus minus altus ſit , ac respiratio ſine ſtertore fiat. A comate verò , tam vigili quàm ſomnolento , quòd comatoſi exſuscitati , loqui & interrogantibus reſpondere obſerventur. Tandem à lethargo quòd qui illo corripuntur , & loquantur & delirent. A quânam autem cauſâ pendeat & foveatur Carus , ex antecedentibus & concomitantibus deſumendum erit : An enim ab hauſto carbonum fumo , mineralium halitibus , narcoticis largiori manu propinatis ? &c. Anvè à cerebri commotione , febre putridâ vel malignâ cujus ſit ſymptoma , copiâ ſeri aut ſanguinis redundantis in cerebro ? &c. Sedula prægreſ-

(a) Illuſtriſſ. D. Lazerme , de morb. cap. pag. 52.


forum , & præsentium percunctatio certam diagnosim Medicum edocebit.

Quanto in periculo versentur carotici indicat ipse symptomatum conspectus ; sed præsertim causa singularis morbi perfecta & cognita. Sæpè enim sæpiùs adest in limine apoplexia. Cùm Carus , capitis vulnera , contusiones validas , & cerebri commotiones subsequitur , non nisi trepano sanari potest , maximè si simul adsit humorum extravasatio. Verùm cùm trepani successus valdè incertus sit , incerta quoque prognosis erit , nec fugiet omninò periculum instans , licèt hoc solo auxilio morbus fugari possit. Si verò ut sæpè fit febribus malignis , aut putridis accrescat ; ab earum fausto vel infasto præfagio & eventu , ipsius Cari (veri tunc febrium symptomatis) pendeat exitus. Ista tamen generalis statui potest regula ; quò gravioribus symptomatibus stipabitur Carus , eò peioris habendus est ominis.

Optimam inveniet curationis methodum , qui causæ singulari cerebrum comprimenti detegendæ studebit ; detectæ propria cuique debellandæ accommodabit remedia. Tandiu enim durabit , aut in pejus excurrat malum , quandiu aderit nervorum compressio : in eâ igitur tollenda , liberoque humorum per vasa cerebri circuitu restituendo , totus incumbat Medicus : quibus verò modis id tentare debeat , indicat ipsamet causa remota & modus quo nervos comprimit. Itaque si à se-ro v. g. sanguinevè extravasatis , cerebri compressio pendeat , arte educenda sunt , dummodò liceat arti ; si à venarum jugularium compressione , iis quàm primùm restituenda est libertas. Si à carbonum , mineraliumvè halitibus , tunc peculiariora tentanda sunt remedia , de quibus vide Ramazzini opera de morbis artificum. Porro cum quotidianâ observatione constet Carum , sanguinis nimix quantitati in vasis cerebri , ejusdem rarefactioni , velocitati , spissitudini , natales debere ; peculiariora cuique vitio tollendo , aut emendando præscribi debent. In genere ea suadentur auxilia quæ humores à capite divertere , aut expellere possunt , qualia sunt venæ sectione

è talo, enemata acria, emetica, sternutatoria, vesicantia, cucurbitæ, quæ soporem etiàm discutunt. At quia pleraque ex sanguinis vitiis modò recensitis à saburrâ in primis viis nidulante originem repetunt, ideò quoque, præmissâ venæ sectione si casus exegerit, optimè conducent remedia quæ saburræ morbum foventis, per vomitum vel catharsim eliminationem promovere queant, quæque sanguini mixta, illi pristinam restituant fluxilitatem. Eos omnes effectus producere valet medicamentum propositum: magnâ enim dosi vomitum, minori catharsim, minimâ diaphoresim promovet. Hinc concludere licet.

Ergò Caro Kermes mineralis.



QUÆSTIO TERTIA.

Utrum amentię ab Hiosciamis, vel Stramonii usu oriunda, balnea vel plantæ alexitaria?

L Icèt Hyosciamus & Stramonium indiscriminatim, virtutis cujusdam accusentur deleteriæ; non inutilè ducimus, paucis sigillatim delineare, 1°. Quos utraque hæc planta exere re consuevit effectus in corpore humano, dùm intùs sumitur. 2°. Utriusque modum agendi qui nobis magis arridebit, & cum phœnomenis observandis congruet exponemus. 3°. Inter recensendos affectus, & circà peculiarem nobis propositum, amentiam nempè paucis differendo, examini subjiciemus, an proposita remedia convenient, & utri magis confidendum sit? Itaque.

1°. Hyosciamis variæ recensentur species, de quibus consule

Tournefortium aliosque Botanicos: de eâ tantum hîc mentio fiet quæ hyosciami nigri nomine indigitatur (*a*) quia species illa cæteras hyosciami species antecedit vi narcotica, quæ mitius agunt (*b*). Hujus speciei partes omnes, gustu & odoratu nauseosæ, eâdem fermè virtute pollent, easdemque noxas inferunt. Qui folia, flores, radicem, semina plantæ hujus comedunt, ejusque decoctum, vel infusum hauriunt, multa mox patiuntur incommoda, quæ sequentibus se produnt phœnomenis. (Varia sunt equidem pro assumentis, temperamento, ætate, &c.) » Ariditate nempè faucium & linguæ (*c*), » artuum stupore, spirituum langore, pruritu universali, mentis alienatione, vociferatione, delirio, vertigine, visûs depravatione, aut abolitione, dyspnœâ, suffocatione « ; quæ phœnomena diversa quoque observare est, cæteris aliundè paribus, pro diversâ hyosciami quæ assumitur quantitate : hujus exigua quantitas, insaniam (*d*) temulantiam, producit, mediocris soporem, major convulsionem, nimia tandem mortem accersit. Planta hæc quæ intus assumpta adeò inimica est, topicum præstans, multis in casibus suppeditat.

Stramonii prima species (*e*), nauseosa quoque, à Tournefortio descripta, in regione nostrâ communis, exotica tamen (*f*) & ex Syriâ & Ægypto ad nos delata, iisdem fermè viribus donatur narcoticis, ac hyosciamus, speciesque illi congeneres, eâdem vi inquinantur deleteriâ ; plereque tamen in minori gradu. Radix & semina (*g*) foliis validius agunt. Singulæ interim partes, intus parvâ dosi sumptæ, somnolentiam faciunt (*h*) Si majori furorem, convulsiones, & sudores frigidus, tandem mortem. Plurimi stupidi manent, languent diù

(*a*) Hyosciamus vulgaris, vel niger C. B. Pin. Tournefort, in inst.

(*b*) Raii historia plantarum, tom. i. pag. 711.

(*c*) Allen synopsis medic. pract. pag. 566. tom. 2.

(*d*) Boerh. in hist. horti Lugduno Batavi pag. 309.

(*e*) Stramonium fructu rotundo spinoso, flore simplici, inst. r. h.

(*f*) Garidel, histoire des plantes des environs d'Aix, pag. 442.

(*g*) Idem. *ibid.*

(*h*) Boerh. in hist. horti Lugduno Batavi pag. 345.

& pereunt. Quin imò solus plantæ olfactus (a) ebrietatem producit. Hujus virtutem apprimè callebant nefarii illi, qui non ità pridem in Occitaniâ & Galloprovinciâ viatores blandè, sed callidè, ad potationem alliciebant: propinabatur vinum venenosi illius feminis particulis contaminatum, quo epoto in somnum versos, temulentiam, aut alium quemcumque affectum (b) opibus spoliabant securè. Hinc faceffat usus quem perdita ganeonum salacitas, turpiter promulgavit. Absit igitur ut unquàm suadeatur internè: mentem enim alienat, & perturbat, & constitit multos qui ejus virtutem ignorantes deglutierant, à recto ratiocinio discessisse, nec penès ipsos fuisse, à cachinnis, ejulatione, aut somno abstinere (c). Quandoque verba faciunt quæ minùs incongrua videntur, eosque statim sanâ mente crederes; sed percunctare ulteriùs: iis videas ignotum esse hominem cum quo colloquuntur, licèt antè assumptum stramonium hunc apprimè cognoscerent, omniaque, quæ ab ipsis prolata fuerant oblivione periisse.

2°. Cùm ex dictis phænomenis constet hyosciamo & stramonio eandem ferè inesse vim narcoticam; à modo generali quo agere existimantur narcotica (d) utriusque istius plantæ actionem desumere non dubitabimus, licèt in iis intensior vis observetur deleteria: hinc eandem generalem curationis methodum requiri, mens nobis est in pravis effectibus hyosciami, & stramonii usui adscribendis, quæ adversùs narcoticorum, opii, v. g. commendatur (e). Itaque particulæ integrantes (f) harumce plantarum, in sanguinis oceanum delatæ, viribus circulatoriis provolutæ, hunc dissolvent, mirèque

(a) Boerh. in hist. horti Lugduno-Batavi, p. 345.

(b) Dans certains temperamens cette semence produit la fureur. Garidel hist. des plantes des environs d'Aix, pag. 450.

(c) Raii hist. plantarum, pag. 749.

(d) Hyosciamus somnum iaducit, ad vires papaveris accedens, cautè tamen usurpandus. Illustriss. D. Petrus Magnol, in horto regio Monsp. pag. 100. Idem pag. 190. Stramonium narcotica est, ejusque usus periculosus.

(e) Quoad curam, vide opium, inquit Allen in synopsi med. pract. pag. 556. tom. 2.

(f) Geoffroi, mat. med. tom. 4. pag. 332.

rarefacient ; hinc sequitur quod arteriæ magis dilatentur , majusque idcirco occupent spatium. Cum hæc ita fiant in vasis cerebri substantiam perreptantibus , comprimuntur necessario iis suppositæ nervorum origines ; à quâ compressione sequitur conditionum defectus quæ ad liberum functionum animalium exercitium adeo necessariae sunt. Porro ut per se patet majorem arteriarum dilatationem excipit major nervorum compressio ; unde erui liquido potest diversitas phœnomenorum quæ usum stramonii & hyoscyami subsequuntur. Sed ut clariùs quæ de amentia dicturi sumus eluscescant, sequentia præmittenda sunt.

3°. Rarefactus & æstuans sanguis , celerius motus , plantarum memoratarum viru inquinatus , arterias cerebri dilatans , vario modo premet cerebrum , variosque inducet affectus , prò ægri temperamento , prò sanguinis impetu , prò variis causis proëgumenis dissimilibus. Si validè comprimantur nervorum origines , & summoperè imminuatur influxus spirituum animalium ad partes voluntati subditas , sensuumque organa , aut idem omnino pereat ; orientur varii affectuum soporiformis gradus , pro majori , minorivè spirituum influxu. Si sanguis ad cerebrum propulsus , celeriori motu quàm par est , non satis comprimat cerebrum ut fiant morbi soporosi , à sanguine celerius moto tendentur vasa , uberior fiet spirituum animalium secretio , cum major copia liquidi secer-nendi applicetur ad organa secretoria. Si verò tunc ab eodem sanguine celerius & inordinatè provoluto , inordinatè moveantur & vibrentur emporii fibrillæ ; orietur spirituum animalium ataxia , tum ab inordinato illo motu fibrarum , tum ab uberiori liquidi nervei secretionem. At verò cum animæ functiones pendere videantur à variis fibrarum emporii ordinatis vibrationibus , & ordinato similiter spirituum animalium motu , manifestè liquet , ab iis perturbatis varias subsequi posse in animæ functionibus læsiones , quæ si cum errore judicii contingant deliria nuncupabuntur , quorum species variæ sunt.

Ut ex fibris cerebri nimium tensis , inordinatè vibratis , co-

mitante spirituum ataxiâ, deliria cum furore exoriri possunt; ita prægressâ earum tensione, nimiam laxitatem, & ut ita dicam, atoniam nancisci queunt; è quarum læsâ vibratilitate, læsâ insuper spirituum animalium secretionem, & fortè ipsorum qualitate, exurgent deliria stupida, vel maximè ad stupiditatem accedentia. In hoc siquidè situm esse videtur, acumen ingenii, ut fibræ emporii debito & ordinato motu gaudeant, quod, statum quemdam rigiditatem inter & laxationem supponere videtur, & naturalem insuper spirituum constitutionem: debet igitur deduci acies ingenii; tùm ab optimâ spirituum diathesi; tùm à debitâ fibrarum tensione, debitoque communicato motu.

De variis deliriorum speciebus filebimus, de maniâ, amentia, & morosi hîc mentio fiet solùm, qui affectus, inter se gradu tantùm differunt. Mania igitur est delirium sine febre, cum furore & audaciâ; & nimiam agnoscit pro causâ proximâ fibrarum emporii rigiditatem & tensionem. Amentia est delirium universale (a) sine furore & iracundiâ; cujus causa continens reponenda esse videtur in laxitate fibrarum emporii; à quâ spirituum torpidus motus. Mania inducetur, quoties fibræ nerveæ tenduntur à sanguine validè in cerebro circulante, sed difficilè propter suam spissitudinem. Amentia, illius præsertim quæ à stramonio oritur, causa proxima videtur esse laxitas fibrarum emporii, vel ab affectibus soporosis inducta post nimiam compressionem passam, vel à nimia harumce tensione prægressâ, quæ non solùm laxitatem, sed atoniam sæpè secùm trahit. Nec obstat amentiam senilem, pendere à rigiditate quæ fit ratione provectionis ætatis. Amentia illa, ex allatâ definitione facilè dignoscitur, & à stramonio, vel hyosciamo pendere dicitur ex prægressis, nec instans portendit periculum. Morosis seu stupiditas, merum non est delirium (b). Sed ingenii tarditas & hebetudo. Ejus

(a) Illustriss. D. de Sauvages, nouvelles classes des maladies, pag. 292.

(b) Idem, *ibid.*

causa, laxitas fibrarum sensorii communis, sed major quam in amentia; unde paralytis mentis quodam modo haberi potest.

Post assumptum stramonium aut hyosciamum, sub quâcumque formâ id factum fuerit, varianda est therapeia, pro vario affectu inducto. Generalis tamen hæc curatio ab Autoribus non infimæ notæ, præsentē adhuc in primis viis veneno, suadetur: » Horum (a) prima cura est, vomitum cientia » exhibere, dein clysteres acres injicere, fortesque ligaturas » cruribus adhibere, interdum etiam cucurbitulas applicare, » quæ si non juvent venam secari in majore pedis articulo » necesse est. Aliorum verò cucurbitulas & venæ sectiones » abhorrentium, est vomitum solummodò provocare, fortes- » que ligaturas & fricationes adhibere; si hæc non sufficiunt balnea ex aquâ calidâ præscribunt: porro à vomitu vinum propinant cui piper & cynamomum admiscetur. Vomitu tantum, post quem adhibuit alexipharmaca, usus est Wepferus (b) in curando puero qui solani furiosi easdem ferè noxas inferentis ac stramonium, baccas deglutierat. Acta Academiae (c) Regiæ Scientiarum asserunt, acida vegetabilia præstans in hoc casu præbere remedium; quæ tamen crederem post vomitum exhibenda. En remedia præscribenda, dum præsens virus ab utrâque plantâ oriundum actionem suam exerit. Porro cum funestum harum usum tristes sæpè comitentur reliquæ, uti v. g. amentia, eò tunc collimare debet Medicus, ut apprimè distinguat, an amentia quæ hyosciami aut stramonii usum subsecuta est, ad maniam vergat, vel ad morosim. Si ad maniam, tunc balneum præstans offert remedium, præmissis aliis convenientibus: si verò magis ad morosim, & stupiditatem; tunc præ laxitate fibrarum cerebri, & fortè inquinatâ spirituum animalium indole, adhiberi possunt

(a) Raii hist. gener. plant. pag. 749. tom. 1. Joannes Boëclerus in materiâ medicâ, pag. 322. Joannes Bauhinus, Mangetus in Biblioth. pharmaceut. & alii.

(b) Wepferus in ciutatæ aquaticæ, hist. pag. 290.

(c) Les acides végétaux sont un remède pour le Stramonium, le Solanum, &c. Hist. de l'Académie Royale des Sciences, ann. 1703. pag. 57.

plantæ alexiteriæ (a) quæ virtute alexipharmacâ, cephalicâ & roborante donatæ, fibrarum cerebri fractum tonum refarcire poterunt, & materiem puriorem procreandis spiritibus animalibus suppeditabunt. Ex his liquet concludi posse.

Ergò amentia ab Hyoscyami, vel Stramonii usu oriunda, quandòque balnea, quandòque planta alexiteria.



QUÆSTIO QUARTA.

An Asthmatis flores Benjoïni?

Asthmatis nomine intelligenda venit apud Medicos chronica & plerùmque peridioca respirandi difficultas, eos angens miserè qui huic morbo obnoxii sunt. Ut triplici potissimum de causâ, & quidem diversâ produci potest morbus ille, ità triplicem admittit divisionem: in pituitosum nempe, convulsivum, tuberculosum; quæ singulæ species brevibus describendæ veniunt.

Asthma vocamus pituitosum, quod copiam ingentem materiæ viscidæ in glandulis bronchialibus congestam, pro causâ habet; cujus indoles diversa deprehenditur: in aliis enim spissa & fermè concreta; in aliis tenuis & limpida, nunc acris, nunc omnis expers acrimoniæ. Multa autem sunt quæ vera hujus morbi principia haberi possunt. Talia sunt, 1°. Digestiones pravæ, sive ob ventriculi debilitatem, sive ob bilis inertiam,

(a) Remedia alexiteria & alexipharmaca unum & idem sonare apud neotericos constat. De his vide Mangeti bibliothecam pharmaceutico-medicam, pag. 26. tom. 1. Veteres ea distinxerunt, & per alexiteria, remedia venenis medentia, extrinsecus applicata intellexerunt; per alexipharmaca, eadem vi pollentia intus sumpta. Vid. Gorræi def. med.

vel quâcumque aliâ de causâ, è quibus pravæ indolis emergit chylus, aquosus sæpè & viscidus, qui vix crebris, repetitisque circulationibus mutari potest in sanguinem. 2°. Retentio insensilis transpirationis, ut fit ab aëre frigido & humido; vitio cutis induratae, ut fit in senibus, quibus hæc asthmatis species adeò familiaris est. 3°. Ipsa humorum diathesis viscida. 4°. Pulmonum debilitas, quæ conditio adeò necessaria est, ut nullatenus aliter concipi, & explicari posset ordo periodicus insultuum asthmaticorum. Debiles sunt pulmones ex naturali constitutione; tales fiunt ob prægressos morbos, catharros v. g. aut aëris humidi consuetudine, &c.

Si ad causam morbi continentem ejusque indolem attendatur, intelligetur facilè, quibus stipari debeat phœnomenis asthma pituitosum. Obrutis enim pondere molesto vesiculis pulmonalibus (a) & sæpè glutine quodam ipsarum parietibus sibi invicem quasi applicatis; fieri non potest ut respirationis motus facilè peragantur. Perdifficilè igitur fient, sæpissimè cum stertore, & sibilo quodam. Aderit tussis ex sensu molesto pulmonum, quam mox sequentur sputa viscida, aquosa, pro diversâ indole materie in vesiculis aggestæ; pulsus debilis, & sæpè intermittens. Ex hoc quoque morbo subsequi potest hydrops pectoris, & œdema pulmonum; & vicissim pectoris hydrops asthma inducere potest (b) (c). Vix datur asthmaticis requies; toto enim sæpè paroxysmi decursu, multis innixi pulvinaribus, somnum captare non audent, ob perpetuum suffocationis metum; nec possunt præ tussi fermè continuâ, & ingrato pulmonum sensu, quietem omninò arcentibus.

Asthma verò convulsivum (d) illud est, quod ex contractione spasmodicâ musculorum mesochondriacorum pendet, nec aliam agnoscit causam proximam, quàm inordinatum fluidi

(a) Bonet sepulch. anat. obs. 26. tom. 1. pag. 496.

(b) Sepulch. anat. Bonet. obs. 86. tom. 1. pag. 524. & seq.

(c) Idem. obs. 72. tom. 1. pag. 515.

(d) Ettmuler pag. 161 & seq. tom. 1. Frid. Hoffm. pag. 94 & seq. tom. 3.

nervei motum in villos musculares prædictos, uberius solito & quam par est irruentis. Hanc perversam fluidi nervei distributionem, accersunt, affectus hypochondriacus in viris, hystericus in foeminis, objecti alicujus assidua & profunda meditatio, potus frigidi & glaciales, vermes in intestinis repetitis morfibus, ipsorum tunicam villosam molestè vellicantes, aër foetus vaporibus nitrosis, sulphureis & metallicis (a), podagra percussa (b), humores rheumatici ad pulmones delati, calculus in vesiculâ felleâ (c) & plura hujusmodi.

Horrendis stipatur symptomatibus; perdificillimè enim respirat æger, cubitis innittitur, cervicem erigit, & instinctu quodam naturali, omnia respirationis organa in auxilium vocat. Fit sibilus, ex arctatâ glottidis rimâ, & per eam velocitate aëris summâ. Ingenti gravatur debilitate; nec mirum cum per pulmones convulsos adeò parva sanguinis copia trajiciatur in cor sinistrum, ut exindè ad cerebrum minima deferatur. Itaque sanguine fermè orbato cerebro, quomodò fieri potest, ut spiritus à quibus pendent vires, non imminuantur summoperè? Adeoque tanta est sæpissimè hæc debilitas, ut in syncopem labatur, & tunc respirat facilius; emergit paulò post è syncope, & rem in vado diceres; sed in similem mox relabitur syncopem. Pulsus habet debilem omnimodò inæqualem, vultum rubore suffusus. Adest tussis sicca, molimen naturæ omninò inefficax ad morbum expellendum. Cor ipsum pulmonibus convulsis compatitur sæpè (d); Utì indicant palpitantes quibus corripitur nobilissimus ille musculus.

Asthma tandem tuberculosum, ut vox ipsa indicat, nuncupatur illud quod à tuberculis, intrâ pulmonum substantiam, aut in eorum superficie externâ enatis principium repetit (e).

(a) Ramazzini oper. de morb. artif. pag. 50.

(b) Sydenham, cap. 10. pag. 79.

(c) Hoffman, tom. 3. sect. 2. cap. 2. obs. 2.

(d) Consulatur de his eximius, cedroque dignus, tractatus de corde, Illustrissimi Regis Galliarum Archiatri Domini de Senac, Medicinæ gallicæ Principis, & decoris. Traité du cœur, tom. 2. pag. 488. & 489.

(e) Sepulch. anat. Bonet, obs. 35. tom. 1. pag. 499. & alibi.

Tuberculorum autem nomine intelligimus tumores exiguos, duros, albidos in vasis lymphaticis reperiendos, quos non aliud esse deprehendas, quàm lympham merè concretam, vel vitio aliquo interno, quale est scrophulosum, vel misturâ partium heterogenearum. Forsàn sufficit talia dari in pulmonibus tubercula, ut fiat dyspnœa, minimè verò ut detur insultus asthmaticus: requiritur ergò prætereà, ut quid novi pulmonibus contingat, difficilior nempe sanguinis per vasa pulmonalia transfluxus, qui toties dabitur quoties obtinebit plethora, sanguis multùm rarefiet, inspissabitur, illius notabiliter augebitur velocitas, ut fit per valida corporis exercitia, cursum præcipitem, &c. Ambæ itaque requiruntur causæ, è quarum concursu exurgit causa continens asthmatis tuberculosi.

Talem affectum sequentia comitantur phænomena. Adest summa respirandi difficultas, minor tamen quam in asthma- te convulsivo, tussis sicca, sensus gravitatis & caloris in thora- ce. Pulsus frequens est, & parvus. Tussim sæpè excipit hæ- moptysis, hæmoptysim, phthisis; quorum omnium explica- tio ex supràdictis eruitur.

Hæc de triplici asthmatis specie præmittenda censuimus, ut in dicendis accuratior ordo servaretur, utque signa & phœ- nomena cujusque seorsim exposita, diagnosim redderent fa- ciliorem. Hæc ipsa insuper phænomena, & phænomeno- rum causæ sigillatim assignata ad certiore prognosim, & therapeiam methodicam, manu quasi deducunt.

Qui igitur errorem in praxi vitare desiderat, scrupulosè sin- gula perpendat symptomata. Quid in hac asthmatis specie, quid in alterâ observetur, secum reputet; mox cognitæ spe- cie causam singularem investiget. Duplex autem se se offert processus curatorius; alius ipso paroxysmi tempore; alius ex- trà paroxysmum, ut sequentibus clariùs patebit.

In paroxysmo asthmatis pituitosi id studeat Medicus. 1°. Ut materiem viscidam in glandulis bronchialibus aggestam atte- nuet & expectorationem promoveat. 2°. Majorem inimici hu- moris

moris affluxum à pulmonibus avertat. Primum obtinebit attenuantium & bechicorum adminiculo, inter quæ optimè seligere potest flores benzoïni qui utrâque virtute pollent, & in eâ asthmatis specie tantoperè commendantur. Ad secundum conducunt purgantia & diaphoretica selecta, quibus adjungi rectè poterunt expectorantia. Caveat autem Medicus nè inconsultò plures suadeat venæ sectiones (a); à primâ etiâ abstineat, nisi summa urgeat necessitas.

Extrâ paroxysmum, annitatur summâ ope, ut debilem pulmonum tonum resarciat: Ideòque camphorata Monspeliensem, aut radicem squinæ in ptisanâ præscribat, quæ eò magis ad præcavendos asthmatis paroxysmos conducent, quòd transpirationem juvabunt. Si saburræ in primis viis nidulent; has per cathartica aut emetica discutiat. Uno verbo singula appositis remediis oppugnet vitia, tùm in solidis, tùm in fluidis, quæ asthma ansum præbere existimabit.

Asthma convulsivum varia exoptulat auxilia, propter causarum diversitatem, inter quæ primum locum obtinet venæ sectio; quâ peractâ faciliùs per pulmones trajicitur sanguis licet contractos; adeòque observatur quòd tales asthmatici, priùs fermè suffocati, subito quasi à mortuis in lucem redeant. Statim autem atque urgentioribus occurrerit, ad alia se accingat quæ sibi prò re natâ facienda incumbunt. Si v. g. ab aëris intemperie pendeat spasmus, ad laxantia sedantia, antispasmodica. Si à saburris in primis viis, ad purgantia, emetica; si à podagrâ percussâ ad revellentia confugere debet, & sic porrò.

Extrâ paroxysmum eâ seligat quæ impedire possint quominùs turbetur ordo fluidi nervei; ideòque ad affectum singularem, subjecti attendere debet, & ad causas quibus obnoxius vivit.

Ad curationem asthmatis tuberculosi, indicare sufficiet quid in genere moliendum sit. Itaque vigente paroxysmo, statim im-

(a) Riverius, de asthma, pag. 246.

minuatur moles sanguinis per venæ sectiones pluries repetendas, sive plethora, sive sanguinis rarefcentia, accusanda veniant. Si ejus spissitudo, prægressâ similiter venæ sectione, illi per attenuentia, diluentia, diaphoretica, pristinus debitusque fluor restituatur. Elapso paroxismo, tenuis diætâ suadenda est, interdum celebranda venæ sectio, diluentibus, aperientibus constanter utendum est; ut præcaveantur plethora, sanguinis spissitudo &c, & tubercula aliquatenus resolvantur, quod spectant quoque flores benzoïni, qui diversimodè maritari possunt^(a). Ex iis omnibus quæ de asthmate diximus, deducitur cuinam ejus speciei potissimum convenient flores benzoïni. Rectè itaque concludemus in genere.

Ergò Asthmati flores benzoïni.



QUÆSTIO QUINTA.

An Aurigini succus fumarie?

A Urigo, apud nonnullos icterus flavus, morbus regius, à colore sortita nomen est, & adesse dicitur, quotiès universa cutis, flavo suffusa colore, cernitur, cum variis functionum læsionibus. Morbus ille inter cachecticos decolores^(b) optimè recensetur.

Genericum icteri vocabulum varias sui complectitur species, ratione coloris, vel causarum, valdè dissimiles. 1°. Ratione coloris, alius flavus, alius viridis, alius niger, dicitur; posterior, intensior est prioribus, multoque periculosior. Horum

^(a) Defauld, in tractatu de phthisi tuberculosa.

^(b) Illustriss. D. de Sauvages, nouvelles classes des Maladies, pag. 438.

in numero referunt multi icterum album, licet vix eo nomine donari debeat, cum diversis stipetur symptomatibus. 2°. Ratione causæ: ea enim hæret primariò in ipso hepate, vel extrà hepar. Insuper, si ad eventum attendatur icteri; alius criticus deprehendetur, cum ægrotantis levamine, ut in febribus acutis (a); alius minus criticus, sed periculosus, qualis ille, qui inflammationum hepatis, ventriculi, & duodeni, fidelis observatur affecla. Nec obstat quòminus rursus plures statuuntur species, icteri illius, qui hepatitidem, ejusque eventum pedetentim subsequitur: de quibus videantur aphorismi Boërhavii (b). Brevis etiàm & chronicus, ratione curationis dicitur. Sed de his satis.

Icterus flavus de quo potissimùm hîc quæstio esse debet, ipso ægri conspectu, dignoscitur. Præter autem cutis flavedinem, plurimis stipatur symptomatibus, quæ tamen non eadem semper, nec eodem numero se prodere solent. Variant ergò ratione ipsius morbi intensitatis, durationis, & causæ: præcipua tamen ista sunt: lassitudo, in hypochondrio dextro pressioni sensus, inappetentia, alvus inconstans, fæces albidæ, animi languor, somnus inquietus, urina flava, crassa (c), linteamina, instar croci, tingens, & obscurè rubra, præcordiorum anxietas, respirandi difficultas, febricula, &c.

Sic breviter descripto morbo, ejusque enarratis symptomatibus, ad causam ejus proximam, accedere convenit: hanc autem in ipsius bilis flavæ misturâ, cum cæteris humoribus, reponendam esse censemus; quam misturam fovet, ipsius bilis regurgitatio ad vasa lymphatica, & ad sanguinis oceanum, ob præpeditam ejus excretionem versùs tubum intestinale, vel ejusdem in hepate secretionem. Hanc siingas, regurgitantem bilem in sanguine, cum eo permixtam, & circumferentem, non fluentem intrà intestinorum cavum, statim se se offeret, tum chylopoiesios, tum variarum microcosmi læsarum

(a) De his vide Hypp. aphor. 64. sect. 4. & alibi.

(b) Vide Boërh. aph. dùm de hepatitide & ictero multiplici, ab aph. 914. ad 952.

(c) Frideric Hoffman, pag. 301. tom. 3.

functionum explicatio. Porro ex prægressis constare videtur, omnia quæ bilis secretionem (*a*) excretionem lædere aut perturbare possunt, causarum remotarum numero adstruenda esse; inter quas illæ primum obtinent, quæ à bilis vel hepatis vitio oriuntur, vesicæ felleæ, emissarii utriusque, aut canalis choledochi obstructione: huc spectant quoque, illius canalis vel intestinorum spasmodicæ contractiones (*b*), quâcumque de causâ eveniant. Iis omnibus ansam præbere poterunt, bilis depravata indoles, spissitudo v. g. ipsius tanta quantitas, ut in sanguine redundet, actio nimia fluidorum in solida, & reactio solidorum in fluida, ut fit in exercitiis immodicis longiusque protractis, animivè pathematibus, calculi, vermes, &c.

Aurigo quam albugineæ tunicæ, totius corporis habitus, urinæ color adeò clarè & distinctè designant, in genere periculosa est. Cùm enim in sanguine redundet bilis, ejus crasim pervertet. Sed quanta exindè malorum seges! His adde quòd cùm ad intestina non deferatur, totum chilificationis negotium perturbabitur; emerget chilus minimè idoneus ut humoribus sanis inquilinus evadat: hinc altera morborum origo. Attamen variari debet præsagium, habito respectu ad morbi causam, symptomatum intensitatem, & ad pravos jam in corpore inductos effectus. Icterus recens, inveterato, curatu facilius est, qui verò inflammationi, obstructioni validæ & inveteratæ, schirro hepatis supervenit, periculosissimus. Si à venenis pendeat, horum energiam prognosis sequetur. Si à calculis, non curabitur, nisi expellantur calculi. Si icterus flavus ad nigrum inclinet, majùs imminet periculum. Si tandem causis gravibus debeat natales, & sit inveteratus; meritò metuetur hydrops. (*c*).

Antequàm quidquàm moliatur Medicus in auriginis curatione, causam illius antea rimetur. Si icterum judicet symp-

(*a*) Boërh. in inst. parag. 817.

(*b*) Frid. Hoffm. p. 302. tom. 3. icterus à colicâ hystericâ. Sydenham, pag 132.

(*c*) Jodoci Lomnii, observ. med. pag. 195.

tomaticum, non priùs symptoma fugabit, quàm ipsum morbum debellaverit. Si venenum accusetur; huic obnitendum est per appropriata remedia. Si à calculis vesicam felleam obturantibus, ductumvè cysticum, vitetur sedulò quidquid, novæ calculorum generationi favere poterit; cui scopo satisfaciunt diluentia & aperientia, cautè præscripta, quibus addenda sunt narcotica, si dolores urgeant. Si exercitia immodica, & animi pathemata; motus solidorum & fluidorum compescendus erit; tuncque præmissis venæ sectionibus, iisque repetitis si necesse sit, in auxilium adhibeat temperantia laxantia, diluentia, levibus aperientibus sociata; purgatione leni præmissâ, & repetita si casus exigat. Si schirrus hepatis, vel inveteratæ obstructions, hunc morbum creaverint, satius erit, medicamenta aperientia (saltem fortiora) vitare nullumque nisi palliativum præscribere, nè schirrus in cancerum mutetur. Si tandem icterus flavus, recens, levibus obstructions, spissitudini sanguinis, bili viscidæ nimis, tribuendus sit; peroptimum erit incidentium, attenuantium, diluentium adminiculo, pristinum fluorem bili, sanguinique restituere. Hæc si succedant votis, sensim in melius vertentur omnia: cùm autem succus fumaris, non secus ac ejus decoctum, aut infusum, iis donetur viribus; apprimè conferat ad obstructions hepatis referandas (a) bilem insuper per urinæ vias eliminet, imò & per alvum, si majori dosi propinetur, rectè concludemus.

Ergò Aurigini succus fumaris.

(a) Raius pag. 405. Fumaria diuretica est ut & sudorifica: obstructions hepatis referat, per urinam icterum ducit. Purgat bilem & humores adustos, verum magnâ dosi exhibita. De his etiâ vide Boër. Tournef. Garidell. & alios.

En fumaris tres speciei usitatior.

Fumaria officinarum & dioscoridis flore purpureo. C. B. Pin.

Fumaria officinarum & dioscoridis flore pallescente. C. B. Pin.

Fumaria officinarum & dioscoridis flore albo. C. B. Pin.



QUÆSTIO SEXTA.

Cuinam speciei sanguificationis læsæ, convenient martialia?

QUÏ possem propositæ quæstioni facere satis, si solis quas tradidere antiqui morborum divisionibus, credere vellem? Existimabant enim, non nisi partes solidas, in morbis affici; iisque solis propriè conflari corpus humanum; fluida verò, quæ juxtà ipsos, quantitate tantum peccare poterant, & qualitate paucis circumscripta vitiis obscurè explicatis; solidorum morbis, ansam tantummodò præbere posse. Quam vana futilisque sit illorum opinio luculentissimis recentiorum^(a) evincitur ratiociniis. Quidam tamen inter neotericos, antiquorum sententiæ, paucis immutatis, astipulati sunt^(b) ^(c). Sed pace tantorum virorum; cum quotidianâ observatione, plurimis vitiis contaminari fluida compertum sit, recentem anteponam, quæ & clarissimos in arte viros fautores habet^(d). Diversa itaque sanguificationis vitia expositurus; 1^o. Quid sit sanguificatio, paucis dicam. Per sanguificationem intelligimus mutationem illam quam pa-

(a) Illustriss. D. Fizes path. pag. 15. & seq.

(b) Hequet. Omnium morborum originem duci à solidis tensis, aut laxis, ubicumque proclamat. Legatur tractatus Med. nat., & præcipuè oratio in tom. primo. Contendit enim vasa omnia, fibris nerveis, constanter fluido nerveo transmittendo dicatis, instrui. Si continuo filo currat fluidum, robur: tensio, si copiosius aut velocius fluat: atonia, si imminuatur. Inquinari posse fluidum illud (quod aëreum, purius aëre communi, supponit), prò diversis resorptis particulis, intra aërem atmosphericum volitantibus; vel in alimentis contentis; vel tandem supprimi usu acidorum, præcipuè mineralium, intus assumptorum, vel inspiratorum; sanguinem verò peccare rarefactione, aut quantitate, nullo alio assignato vitio.

(c) Baglivi, maximam morborum partem, vitio solidorum tribuit, ut videre est pag. 219. de fibrâ motrice & morbosa. Editio Lugd. 1703.

(d) Boërh. path. pag. 377. Astruc in sua path.

titur chylus dùm in sanguinem convertitur. Vi tantùm mechanicâ , non verò fermenti peculiaris inditi dextro cordis thalamo ; mistione perficitur : Quâ enim proportionē ad subclaviā devectus , instillat chylus ; ingenti sanguinis quantitate , continuò tranantis abripitur devehendus ad dextram cordis auriculam , è quâ ut potè lacertis instructâ , in cor dextrum pellitur ; hinc ad vasa pulmonalia , (præcipua sanguificationis organa). (a) In toto illo tractu , conquatur ; in pulmonibus verò , exactissimè juxtâ innumeras vasorum divisiones separatur ; vi parietum in quos impingit , & à quibus iterum repellitur , magis atteritur & miscetur accuratiùs cum sanguine. Tandem ad ventriculum cordis sinistrum , ducitur , unde contracto corde , de novò conquassatus , ad omnes corporis partes amandatur , in quibus ultiores adhuc divisiones , & mutationes experitur. Minutissimæ partes chyli , sic attriti , divisi , exactè permixti cum sanguine iteratis circulationibus , in globulos lymphaticos abeunt , qui sibi invicem juxta proportionē adunati , rubrum efformant globulum. (b) (c).

Ex suprâ dictis liquet sanguificationis læsæ causam , à vitio quodam chyli , & solidorum simul , vulgò eruendam esse. Quotuplici ergò modo , lædatur sanguificatio , facile concipi poterit cùm vitia fluidorum & solidorum exposuerimus ; quod brevitatis causâ promiscuè exequemur.

Ad tria potissimùm capita , reduci possunt fluidorum vitia : ad quantitatem nempe , motum , & qualitatem. Cùm autem humorum vitia in quantitate , adauctâ , vel imminutâ , absolute vitii nomine designari non debeant , nec ad quæstionem propositam plurimum spectent ; de his filebimus. Insuper cùm humorum motus , tam adauctus quàm imminutus , sæpissimè , pravam eorum qualitatem redarguat ; non multùm à nostro discedemus munere , si à vitiis humorum enarrandis , quatenus à motu pendent , abstineamus. In iis ergò describen-

(a) Boërhav. Phisiol. pag. 120. §. 208.

(b) Leuvenhoek , epist. 56. pag. 8.

(c) Qui de his plura volet adeat tract. de corde, Autore Illustrissimo D. de Senac, pag. 75.

dis vitiis quæ in qualitate ponuntur , hîc toti erimus cum sanguificationem læsam præcipuè constituent.

Sanguis ex naturâ suâ , diversis substantiis quæ nudis obviæ sunt sensibus, lymphâ aut sero, partē mucilaginosâ, quæ in patellâ fibrosâ evadit ; tandem globulosâ purpureâ , conficitur. Insunt prætereà partes oleosæ volatiles , & sales falsi (a) Certo quodam ordine , certâque invicem temperantur proportionē , illa sanguinis diversa principia , ità ut si quid illorum excessu , vel defectu peccaverit ; exindè vitium statim exsurgat. Inquinatus quoque habebitur sanguis , si cum ipso quid misceatur heterogenei. Hinc duplex generale vitium : in diathesi nempè malâ , & in dyscrasiâ.

Sanguinis viscositas , intimiori molecularum contactui , & adhæsiōni majori debetur. Positâ semel in sanguine redundantia partis mucosæ , in eâdem proportionē , imminutâ partium lymphaticarum & globulosarum quantitate , faciliè stabilietur vitium illud. Quæ igitur, motum sanguinis progressivum retardant , ut plethora vera ; quæ condensant fluida , ut acida ; quæ crassum , tenacem , suppeditant sanguini chylum , ut alimenta viscida ; quæ fluidiora evacuant , ut purgantia , inter causas remotas , optimè recensenda esse evidenter patet. Huic debellando vitio conducunt , diæta ab omni viscido aliena , ad alkalinum vergens , exercitium moderatum. Cùm autem non detur erethismus in solidis , attenuantia remedia , aquæ ferruginosæ , martialia , antimonialia &c , veniunt præscribenda. Si autem inflammatio , hunc sanguinis statum concomitetur , egregii tunc erunt auxilii venæ sectiones , diaphoretica levia , ut succus borraginis , &c. Tandem ad alkalina recurrendum , cùm priùs constiterit vitii causam , ab acido manifestè declarato , esse desumendam.

Sanguinis fluxilitas tribuenda est , rariori , minori que molecularum contactui ; undè adhæsiō minor erit. Si partem serosam , & globulosam fingas , mucilaginosæ prævalere , fluxilitatis causam erues facillimè. Huic diathesi ansam præbent ,

(a) Illustriss. D. De Lamure , conspect. physiol. pag. 17.

quæcumque chylum aquosum nimis reddunt, quæ consuetas sanguinis, urinæ, salivæ aquosas evacuationes supprimunt, &c. Tandem, quæ partem sanguinis rubram, nimium imminuunt, ut sanguinis uberior detractio, aut frequentior. In eo vertit indicatio curatoria, ut nativa fluidis restituatur proportio; restituetur autem, partem redundantem evacuando, mucilaginosam verò adaugendo. Si igitur abundet aquosus latex; per diætam siccam exercitationem fortem, purgantia valida, diuretica calida, & sudorifica, inchoanda est medela. Si verò à suppressis evacuationibus, ad id collineandum ut quàm primum restituantur. Porro cùm vitium illud in fluidis, solidorum quoquè complectatur segnitiam, perutilis erit externus tonicorum usus; stuparum v.g. ammochofiæ. Pituitosæ intemperiei nomine designatur illa humorum constitutio, quæ in leucophlegmaticis observari solet.

Constitutio sanguinis acris, unà cum spissitudine, pendet à scattente sale muriatico, cum dissipatione lymphæ, & præsertim mucidi adunatione, & aggestione globulorum. Eò vergit indicatio curatoria, ut sanguinis acrimonia retundatur, diluatur, atteraturque pars globulosa. Ad hunc scopum diætæ diluènti, & humectanti, juniorum animalium usui, indulgeat æger. Diluentia edulcorantia, mucilaginosæ, lacticinia, subacida, balnea, semicupia, diuretica frigida, apprimè conducunt in principio: mox aperientia cum edulcorantibus maritata veniunt adhibenda, quæ secundam adimplebunt indicationem. Complicatur cum erethismo solidorum, dyscrasia illa, arguens dispositionem phlogisticam, in histericis & melancholicis, observanda. Sanguis autem sic constitutus, melancholicus appellari potest. Obtinebit dissolutâ sanguinis dyscrasia, quoties pars mucosa, intermixto sale quodam muriatico, dissolvetur & dissolabitur, supererit interea pars serosa, cum globulosâ permixta. Hæc si ita fiant; residuus sanguis, colore vividiori donabitur. Minor porro molecularum contactus, ratione particularum salis interpositarum, unà cum defectu mucidi, causam hujus dyscrafiæ proximam exhibet. Ad talem ergò in humoribus procreandam dyscrasiam, conducunt maximè, quæcumque partes salinas

& acres, chylo in oceanum sanguinis devehendo, suppeditant, vel quæ impediunt, quominus jam nati, & evoluti sales, per quandam excretionis viam, eliminantur: huc quoque faciunt, quæ sanguinis mucilaginem consumunt, qualia sunt liquorum ardentium abusus, motus nimis validi, longiusque protracti, &c. Huic succurritur dyscrasie. 1°. Diæta humectante, edulcorante, usu alimentorum mucilaginosorum, quiete diuturnâ. 2°. Remediis diluentibus, incrassantibus, ut salium actio retundatur; mucilaginosi, ut mucosa pars sanguini restituantur. Lacticiniis, cremoribus diversis, mira præstari praxis edocet, cum vitium chronicum est. Verum cum acutum est, & ad alkalescentiam multum vergunt humores; acida, tum mineralia, tum vegetabilia, sunt usurpanda. Tandem si primæ viæ afficiantur, purgantibus, antiphlogisticis utendum est. Hæc humorum constitutio quam comitatur solidorum erethismus, ad biliosam antiquorum referri potest.

Cacochymia sanguinis purulenta, ea est in quâ, pure in massam sanguineam retropulso, à parte peculiari ubi perficiebatur, dissolvitur sanguis, in colliquationem abit. Incrassantibus ergo, edulcorantibus, detergentibus, huic vitio adversabimur. Cum ægri, insigni levamine lac purum, aut alteratum decoctione quâdam abstergenti, præscribitur. Accidit sæpè ut lacte gravetur, & molestè afficiatur ventriculus; quo in casu ad juscula edulcorantia confugiendum est.


Virulenta sanguinis cacochymia, sub duplici respectu considerari potest; quatenus nempe, chronica est, aut acuta. Chronica, acris simul, & grumosa, ut in viru syphilitico, &c. Acuta, acris dissoluta, ut in peste, variolis malignis, &c. (a). In primo casu conveniunt, diluentia cum edulcorantibus, quorum usum excipere possunt, aperientia cum edulcorantibus maritata. Tandem peculiari cuique viru, peculiare opponendum est remedium. Sic balnea, & hydrargirum, syphilitidi, &c. In secundo casu, acescentia, incrassantia, diluentia conveniunt.

Tandem variarum sanguinis partium mistura, adeò imperfecta, ut pars globulosa, in grumos quasi abeat, dùm lymphæ ad acidum vergens, sua difficilè percurrit vasa, solidis signitiem inferendo, chloroticam constituit diathesim: cui ut afferatur medela, singularis illius investiganda causa est. Si à catameniiis suppressis, emmenagoga: si à mœrore, auxilia moralia, blanda cum amicis colloquia, suadenda sunt. Diæta conveniens servetur, ab absurdis se abstinendo. In hoc affectu, maximè, & quidem merito, commendatur martialium usus: virtute enim aperienti, & tonicâ gaudent; aperienti, globulos sanguinis atterendo, eos pares reddunt, qui cum lymphæ & mucosâ, intimiùs jungantur: tonicâ, vasis laxatis, & debilitatis, tonum & robur restituunt, quorum ope validiùs impingunt in fluida, ideòque accuratior eorum obtinetur mistura. Omni igitur ex parte, indicationibus istius diathesis speciei, satisfaciunt martialia. Accidit quandòque, ut stomachus, martialia respuat; non tamen ab iis abstinendum est; sed ut cautè præscribantur, à præparationibus martis levioribus inchoetur: sin autem à croco vel ferro puro; à minimâ dosi, ad majorem sensim accedat,

Quamquam autem vitium istud; præcipuè chlorosi producendæ, dicaverimus, non negamus idcirco, plures alios morbos, ab eo exoriri posse. Existimamus insuper, ipsam chlorosim, ab aliis suprâ recensitis humorum dyscrasiis, separatim vel conjunctim, induci posse. Ideò igitur tantum, talem diathesim vitium diximus chloroticum, quia, ut plurimùm, affectuum chloroticorum, origo habenda est.

Patet, ni fallor, nullum esse statum sanguinis vitiatum, qui erui non possit, ex vitiis recensitis, diversimodè combinatis. Singulari cuique speciei sanguificationis læsæ, propria & peculiaria assignavimus remedia, inter quæ de martialibus quæstio fuit.

Ergò quæ hætenùs diximus, sufficienter indicant, cuinam speciei sanguificationis læsæ, convenient martialia.



ERRATA.

Pag. 10. *lin. ult. sectione, leg. sectiones.*
 Pag. 11. *circà tit. Quest. 3. alexitaria, leg. alexiteriæ.*
 Pag. 12. *lin. 17. temulantiam, leg. temulentiam.*
 Ibid. *lin. 25. plereque, leg. pleræque.*
 Pag. 16. *circà finem, stupiditatem, leg. stupiditatem,*
 Pag. 21. *lin. 21. squinæ, leg. chinæ.*

Cætera Lector benevolus emendabit.